







41.132
0.254
P5



TIFFEN Color Control Patches

© The Tiffen Company, 2007



助字辨略卷五目錄

入聲

獨

伏

孰

孰通

酷

屬

足

一屬

逐

逐同

簇

復

儵

儵同

觸


欲

趣

促同

不

否通



實寔同

壹一通

必

率

卒

弗

佛

汔

粵

悉

疾

畢

聿

勿

厥

迄

訖

越

日吹通

曰

咄

忽

末

竊

迭

竭

劣

別

軼通

沒

曷

害

脫

沒

蔑

絕

煞

設

略

諾

若

莫

索

薄

劇

格

驀

隔附

卻

著

約

各

迳

嚙

嚇

盍

亦

適

迪

職

式

抑

卽

則

特

及

適

的

直

極

亟

得

克

或

立

剋通

合


輒

業

盍

恰

阿



助字辨略卷五

獨 眾之對特辭也詩小雅我從事獨賢史記齊悼世

家乃常獨早夜掃齊相舍人門外又唯也但也史記

荆燕世家今營陵侯澤諸劉為大將軍獨此尚觴望

外戚世家自古受命帝王及繼體守文之君非獨內

德茂也蓋亦有外戚之助焉獨得為唯者特之轉也

又史記王翦傳今間荆兵日進而西將軍雖病獨忍

棄寡人乎孟嘗君傳君獨不見夫朝趨市者乎司馬

確山劉淇武仲

相如傳獨不聞天子之上林乎左太沖魏都賦萬一
譬焉亦獨犖麋之與子都培塿之與方壺也此獨字
語助辭獨得爲語辭者唯之轉也

簇
花蕊夫人宮詞廚船進會簇時新方言以極新爲
簇新也

伏
漢書文帝紀臣伏計之大王奉高祖宗廟最宜稱
曹子建求自試表伏見先帝武臣宿兵年耆卽世者
有閒矣求通親親表伏惟陛下咨帝堯欽明之德凡
云伏者以卑承尊之辭也自宋以來表文多用伏以

爲發句

復
禮記禮運言偃復問曰如此乎禮之急也案復又
也更也再也重也上文云言偃侍側曰君子何歎此
又更問故云復也漢書匡衡傳陛下聖德天覆子愛
海內然陰陽未和姦邪未禁者殆論議者未丕揚先
帝之聖功是以羣下更相是非吏民無所信爭言制
度不可用也務變更之所更或不可行而復復之上
復字又也下復字反也世說注山公啟事曰詔選祕
書丞濤薦曰紹平簡溫敏有文思又曉音當成濟也

與字辨
猶宜先作祕書郎詔曰紹如此便可爲丞不足復爲
郎也此言不必又使之爲郎也又左傳文公七年復
爲兄弟如初此復字猶還也仍也又世說注王處仲
謂阮修曰鴻臚丞差有祿卿常無會能作不修曰爲
復可耳爲語助復可猶云亦可又世說君出臨海便
無復人又云阿奴今日不復減向子期陶淵明詩謂
人最靈智獨復不如茲此復字語助也

孰

爾雅云疇孰誰也邢疏云皆謂語辭不爲義也愚
案孰誰也何也如論語孰不可忍也公羊傳哀公十

四年孰爲來哉孰爲來哉史記文帝紀乃十一月晦
日有會之適見於天蓄孰大焉太史公自序襄公傷
於泓君子孰稱此孰字何也曷也如論語君孰與不
足此爲誰何之辭也又通作孰皮襲美和張處士詩
序魯望視予困與承吉生前孰若哉案孰本作孰緣
是一字故通用非誤也

儻

與倏同忽也楚辭少司命儻而來兮忽而逝

酷

白虎通云極也南宋書高帝紀何無忌劉牢之之
外甥酷似其舅世說孫興公道曹輔佐才如白地明

目字新田
光錦裁爲負版袴非無文采酷無裁製

觸 王仲初詩諸院門開觸處行觸處猶是處今云到處也

屬 左傳成公二年下臣不幸屬當戎行杜注云屬適也晉語有韎韋之跗注君子也屬見不穀而下無乃傷乎韋注云屬適也愚案屬適也會也正當之辭如宇文道庾子山集序屬我太祖獻策魏帝命將荆衡此屬字猶會也又漢書張良傳上曰天下屬安定師古云屬近也霍光傳將軍之廣明都郎屬巨師古云

屬巨近巨也愚案此屬字亦是適辭但上屬字是正適之義此屬字是適纔之義故師古云近也如魏志賈詡傳太祖曰與卿言而不荅何也詡曰屬適有所思故不卽對巨此言適纔正有所思也

欲 將也凡云欲者皆願之而未得故又得爲將也王右軍帖想弟必有過理得慙寫懷若此不果後期欲難冀張曲江歲初處分敕故我元元皇帝著道德五千文明乎真宗致於妙用而有位者未之講習不務清淨欲令所爲之政教何從而致於太和者耶白香

山詩禊事脩初畢游人到欲齊

足 戰國策可謂足使矣注云足猶能也又孟子王由足用爲善又云牲殺器皿衣服不備不敢以祭則不敢以宴亦不足弔乎史記鄒陽傳鄒陽辭雖不遜然其比物連類有足悲者漢書高帝紀吾入關秋豪無所敢取文穎云豪秋乃成好舉盛而言師古云豪成之時端極纖細適足喻小非言其盛世說君何足復受人寄載來此足字猶可也適足猶云正可又左傳隱公二年戎請盟公辭杜注云許其修好而不盟禦夷翟者不壹而足也此足字猶已也止也又漢書外戚傳王太后曰太子小而傳太后抱養之今至太子家以乳母恩耳不足有所妨不足猶云不至也言不至于有所妨害也又世說注紹如此便可爲丞不足復爲郎也此不足猶云不必又魏志鍾會傳鍾會所統五六倍於鄧艾但可敕會取艾不足自往華佗傳忍病十年壽俱當盡不足故自剗裂此不足猶俗云不直得也

趣 與促同猶亟也史記曹相國世家參聞之告舍人

趣治行吾將入相周勃世家自竇長君在時竟不得
侯死後乃封其子彭祖顧得侯吾甚恨之帝趣侯信
也

逐

范忠宣公義莊規矩劄子竊念臣父仲淹先任資
政殿學士日於蘇州吳長兩縣置田十餘頃其所得
租米自遠祖而下諸房宗族計其口數供給衣食及
婚嫁喪葬之用謂之義莊見於諸房選擇子弟一名
管句亦逐旋立定規矩令諸房遵守逐猶隨也旋者
臨時立事非豫爲之也此言隨其條件創立規矩故

云逐旋立定規矩也逐追逐也追逐有相隨之義故
逐得爲隨也自宋以後多用逐字爲辭如逐人逐事
逐件逐年逐月逐日逐時之類皆謂隨其事物以爲
區處無所脫漏故云逐也

不

廣韻云與弗同愚案弗也莫也又爾雅夷上洒下
不濬郭注云平坦而下水深者爲濬不發語聲邢疏
云不者蓋衍字郭云不發聲也又莊子讓王今有飢
色君過而遺先生食先生不受豈不命耶豈不猶豈
非也又漢書武五子傳贊不一日而無兵枚皋傳又

自詆媿其文。訛跛曲隨其事，皆得其意，頗恢笑不甚。閑靡凡可讀者，不二十篇。此不字猶云無也。後漢書孔融傳，觀君所言將不蚤惠乎？世說將不畏影者，未能忘懷，將不猶云將無，將非也。又詩小雅有苑者，柳不尙息焉。左傳襄公二十九年，先君若有知也，不尙取之。此不字疑辭，猶云無亦無乃也。又易離卦九三，日昃之離，不鼓缶而歌，則大耋之嗟。漢書天文志，其後熒惑守房之鉤鈴，鉤鈴天子之御也。占曰：不太僕，卽奉車不黜，卽死也。此不字兩設之辭，言不如此則

如彼也。又論語不曰堅乎磨而不磷，不曰白乎涅而不緇，不曰猶云豈不曰省文也。又後漢書朱穆傳注，穆與劉伯宗絕交書云：昔我爲豐令，足下不遭母憂乎？此不字下如有嘗字，不乎云者，反言其曾如此也。又戰國策孟嘗君奉夏侯章以四馬，百人之會，遇之甚歡。夏侯章每言不嘗不毀之也。注云：不嘗如云未嘗。又漢書高帝紀引兵西無不下者，又大學是故君子無所不用其極。漢書高帝紀，廷中吏無所不狎侮，無不無所不竝，皆辭也。又大學有國者不可以不慎。

漢書高帝紀良曰臣爲韓王送沛公不可不告又云
項伯許諾卽夜復去戒沛公曰旦日不可不早自來
謝不可不當辭反言之也又漢書高帝紀願君召諸
亾在外者可得數百人因以劫眾眾不敢不聽不敢
不懼辭反言之也又漢書王嘉傳人情不能不有過
差宜可闊略令盡力者有所勸不能不猶云不得不
或格於勢或限於才力無可如何之辭也又左傳昭
公四年子產見左師曰吾不患楚矣汰而復諫不過
十年史記孔子世家吾所伐者不過四五人不過者

僅辭言少也蘇秦傳臨蓄之中七萬戶臣竊度之不
下戶三男子不下者約計之辭言多也如云祇在三
男子以上不在三男子以下也又李義山詩不道劉
盧是世親不道猶云不謂也又府鳩切陶淵明詩今
我不爲樂知存來歲不又幫鋪切漢詩使君謝羅敷
還可共載不又方九切與否同以上二音竝未定之
辭也不有未定之義故爾雅注訓爲發聲而不尙之
不得爲疑辭也

實 與寔同爾雅云寔是也郭注云公羊傳曰寔來者

何是來也邢疏云是此也秦風駟鐵云奉時辰牡郭
云公羊傳曰寔來者何是來也者案春秋桓五年冬
州公如曹六年春正月寔來公羊傳曰寔來者何猶
云是人來也引之證寔爲是也愚案秦風奉時辰牡
毛傳云時是也實時音相近故皆得爲是也如左傳
莊公十八年虢公晉侯鄭伯使原莊公逆王后于陳
陳媯歸于京師實惠后實惠后者猶云是爲惠后也
又周語叔父實應且憎以非余一人吳語雖四方之
諸侯則何實以事吳左傳昭公十一年今茲諸侯何

實吉何實凶此實字語助辭不爲義也實得爲語助
者是之轉也又廣韻云誠也愚案誠也信也左傳隱
公六年陳侯曰宋衛實難鄭何能爲漢書高帝紀實
不持一錢朱買臣傳其故人素輕買臣者入視之還
走疾呼曰實然又水經注漢書音義曰陽山在河北
陰山在河南謂是山也而卽實不在河南卽實猶云
其實又左傳定公十年公會齊侯於祝其其實夾谷杜
注云夾谷卽祝其也愚案此謂據實而言祝其卽是
夾谷故訓實爲卽也又晉語伯宗妻曰諸大夫莫子

若也然而民不能戴其上久矣難必及子子益亟索士憇庇州犁焉得畢陽及欒弗及之難諸大夫害伯宗將謀而殺之畢陽實送州犁於荆此實字猶云果也果木實也故實得爲果然之辭此言與索士之謀應也

悉 皆也盡也史記五帝紀悉舉貴戚及疏遠隱匿者壹 與一通禮記檀弓壹似重有憂者正義云壹者沒定之辭也愚案壹專一猶言誠也實也誠非虛假故訓爲沒定辭也如檀弓有子謂子游曰子壹不知夫

喪之踊也予欲去之久矣莊子大宗師顏回問仲尼曰孟孫才其母死哭泣無涕中心不戚居喪不哀無是三者以善喪蓋魯國固有無其實而得其名者乎回壹怪之諸此壹字其義竝同又詩小雅爾之安行亦不遑舍爾之亟行遑脂爾車壹者之來云何其盱爾還而入我心易也還而不入否難知也壹者之來俾我祇也此壹字語辭壹者猶云是人也蘇公刺暴公譖已故不斥言之而曰壹者猶詩云彼其之子左傳云夫已氏也壹得爲語辭者實之轉也如淮南子

伯樂喟然太息曰一至此乎漢書東方朔傳拔劍割肉壹何壯也杜子美詩一昨陪錫杖李義山詩一爲戒波濤又云王孫歸路一何遙諸一字竝是語辭不爲義者也又左傳昭公十年平子伐莒取郟獻俘始用人於亳社臧武仲在齊聞之曰周公其不饗魯祭乎周公饗義魯無義詩曰德音孔昭視民不佻佻之謂甚矣而壹用之將誰福哉杜注云壹同也同人於畜牲愚案祭無用人之理用人是以人爲畜故訓壹爲同今謂凡相類曰一如何卽此義也然此壹字未

宜訓同此言使民無義謂之佻用人於社佻之甚者而魯乃行之非周公之心其不饗而福之也壹字在此猶云是也寔也亦是語助不爲義也又儀禮公食大夫禮三牲之肺不離贊者辯取之壹以授賓鄭注云壹猶稍也愚案稍漸也壹無訓漸之文此亦是專一之辭猶云特也又詩國風政事一埤益我朱傳云一皆也後漢書順帝紀其閭顯江京等知識婚媾禁錮一原除之注云一猶皆也愚案一皆也悉也猶云一切也如漢書成許后傳家吏不曉今壹受詔如此

且使委搖手不得此一字一切也如水經注余案風俗通云里語稱狐欲渡河無如尾何且狐性多疑故俗有狐疑之說亦未必一如緣生之言也韓退之順宗實錄一不以簿書介意此一字猶云悉也又漢書文帝紀歲一不登民有飢色一不登猶云一旦不登省文也又史記荆燕世家臣觀諸侯王邸第百餘皆高祖一切功臣索隱云此一切猶一例同時也又漢書平帝紀吏在位二百石以上一切滿秩如真師古云一切者權時之事非經常也猶如以刀切物苟取

整齊不顧長短縱橫路溫舒傳媮為一切如淳云一切權時也愚案此二條當如索隱所訓猶云一概也一切滿秩承二百石以上而言自二百石至二千石非一等故云一切也媮為一切言事事皆媮也如漢書諸侯王表奏據勢勝之地騁狙詐之兵蠶食山東壹切取勝此一切乃苟且之辭也張敞傳偷長曰今一旦召詣府恐諸偷驚駭願壹切受署此一切乃權宜之辭也又大學自天子以至於庶人壹是皆以修身為本朱注云壹是一切也又論語一則以喜一則

以懼一則云者兩設之辭也又史達祖東風第一枝詞萬一灞橋相見萬一或然之辭猶云儻也

疾 急也書召誥王其疾敬德

必 廣韻云審也愚案洩定之辭論語則吾必在汶上矣必也正名乎君子疾夫舍曰欲之而必爲之辭又云今之成人者何必然何必然言不必定如此又云何必高宗古之人皆然此何必猶云豈但

畢 盡也皆也言皆則盡不盡未可知也言盡則皆不

皆未可知也兼二義謂之畢書泰誓羣后以師畢會

戰國策秦自四境之內執法以下至於長輓者故畢曰與嫪氏乎與呂氏乎史記蕭相國世家列侯畢已受封

率 史記平準書率十餘鍾致一石又云於是商賈中

家以上大率破老莊傳故其著書十餘萬言大抵率

寓言也率大率大抵竝都凡之辭大抵率者重言也

又禮記祭義古之獻爾者其率用此與陳氏集說云

率舊讀爲類愚案類亦率也今謂大率曰大類也又

論語子路率爾而對世說注鎮西謝尙鎮牛渚乘秋

佳風月率爾與左右微服泛江杜子美詩目擊如臨
邑至嵒山湖亭奉懷李員外率爾成興率爾猶云遽
然又漢書成許后傳事率眾多不可勝以文陳世說
注尚嘉其率有勝致即遣要迎顏氏家訓蔡邕月令
章句云荔似挺高誘注呂氏春秋云荔草挺出也然
則月令注荔挺為草名誤矣河北平澤率生之此率
字猶云頗也又詩周頌貽我來牟帝命率育毛傳云
率用也正義云釋詁云率由自也由自俱訓為用故
率為用也愚案毛訓率為用者猶云以也乃辭之助
非作用之用也

聿 書湯誥聿求元聖孔傳云聿遂也正義云聿訓述

也述前所以申遂故聿為遂也詩國風歲聿其莫毛
傳云聿遂也正義云歲實未莫而云聿莫故知聿為
遂遂者從始嚮末之言也愚案聿語辭不為義者也
與曰吹通竝通詩豳風曰為改歲漢書食貨志引詩
作聿為改歲師古云聿即曰也小雅見睨曰消荀子
引詩作見睨聿消大雅適求厥甯說文引詩作吹求
厥甯漢書敘傳吹中和為庶幾兮師古云吹古聿字

由也由中和之道庶幾免於禍難文選幽通賦作聿
中和為庶幾兮李善云曹大家云聿惟也案廣韻云
吹辭也則惟亦是辭曹訓義長也又大雅借曰未知
亦聿既耄亦聿竝語辭重言之也

卒 爾雅云既也郭注云既已邢疏云皆謂盡已也廣
韻云卒盡也終也書大誥予不敢不極卒甯王圖事
此言不敢不極盡甯王所圖之事也史記周本紀管
仲卒受下卿之禮而還此卒字終竟之辭也又史記
歷書鷄三號卒明注云卒斯也愚案卒得為斯者既

之轉也既固也固乃也乃斯也又史記酷吏傳野彘
卒入廁卒猝同遽也

勿 廣韻云無也莫也如論語己所不欲勿施於人此
為莫辭也禁止之辭也如非禮勿視非禮勿聽四勿
字無辭也顏子明睿所照其用功只在知其是禮非
禮一見非禮自然私欲不行與原憲克伐怨欲不行
有別作禁止辭者誤也又易益卦上九立心勿恆此
勿字與弗通不辭也又爾雅云勿念勿忘也郭注云
勿念念也邢疏云勿念念也念即不忘也若大雅文

王篇云無念爾祖是也愚案無念之無疑辭也詳一卷無字條下然則勿與無通亦當得為疑辭也

弗 論語吾與女弗如也正義云弗者不之深也史記竇田傳長安諸公莫弗稱之莫弗猶云無不

厥 爾雅云其也詩大雅厥初生民厥初其初也又史記自序左邛失明厥有國語又云成一家之言厥協六經異傳此厥字語辭猶云爰也

弗 書堯典帝曰吁咈哉蔡傳云咈者甚不然之之辭 爾雅云至也邢疏云迄者自古至今也大雅生民

云以迄于今又漢書高帝紀後九月師古云據漢書表及史記漢未改歷之前迄至高后文帝屢書後九月愚案迄至重言也又沈休文答樂藹書時無麗藻迄乃有碑無文迄乃猶云至于又左太冲魏都賦成都迄已傾覆顏氏家訓以此而求迄無了者此迄字終已之辭也

汔 爾雅云音祈汔也郭注云謂相摩近邢疏云說文

云剗摩也郭讀幾為剗云謂相摩近孫炎云汔近也大雅民勞云汔可小康鄭箋云汔幾也反覆相訓故

汜得為幾也昭二十一年左傳亦引此詩杜預云汜期
 也然則期字雖別皆是近義言其近當如此史記稱
 漢高祖欲廢太子周昌曰臣口不能言然臣期知其
 不可陛下雖欲廢太子臣期不奉詔言期者意亦與
 此同也愚案詩大雅汜可小康毛傳云汜危也危是
 幾將之辭故詩箋訓汜為幾也左傳昭公二十一年杜
 注云汜其也未嘗訓期豈舊本有此文邪其語辭也
 周昌云期乃口吃聲皆不為義與幾將之義無涉正
 義云然者謂汜既是幾辭又與期通為語聲也又漢
 書元帝紀引此詩師古訓汜為至言人至此可以小
 安逸之非也

訖 爾雅云止也邢疏云訖者終止也漢書西域傳結
 配烏孫竟未有蓋反為中國生事然烏孫既結在前
 今與匈奴俱稱臣義不可距而康居驕黠訖不可拜
 使者師古云訖竟也後漢書和帝紀司隸刺史訖無
 糾察注云訖竟也愚案竟終竟猶云卒也魏志邯鄲
 淳傳注誦俳優小說數千言訖此訖字已也畢也以
 上三條竝是終止之辭而義有殊別又尚書序訖于

周詩關雎序箋云自風風也訖末名爲大序此訖字與迄通至也

粵 爾雅云粵于爰曰也郭注云書曰土爰稼穡詩曰對越在天王牙出征又爾雅云爰粵于也郭注云轉相訓邢疏云皆謂語辭發端轉互相訓也徐鉉云凡言粵者皆在事端句首未便言之駐其言以審思之故從案案審字也其聲氣舒久故從亏愚案粵字有在句首者亦有在句中者皆爲語辭而義有少別如史記周本紀粵詹維伊毋遠天室此粵字在句首發

語辭也漢書敘傳尙粵其幾淪神域兮此粵字在句中助語辭也應邵訓粵爲於於亦語辭也文選幽通賦作尙越其幾粵越曰竝通也

越 詩國風越以醜邁周頌對越在天鄭箋竝云越於也愚案越以醜邁之越發語辭也如書召誥越若來三月是也對越在天之越語助辭也漢書律歷志引書作粵若來三月越若皆語辭重言之也又書微子殷遂喪越至于今孔傳云言遂喪亾于是至于今愚案傳承爾雅爰粵同訓故訓越爲于是于是者爰辭

也又盤庚不服田畝越其罔有黍稷疏云越本又作
粵音曰于也愚案此越字亦于是之辭疏云于也者
省也又書泰誓我友邦冢君越我御事庶士蔡傳云
越及也愚案越得為及者越若皆語辭若有及與之
義故越亦可通為及也又書立政亦越成湯亦越文
王武王蔡傳云亦越繼前之辭也愚案本文竝是更
端而言非有因繼不如蔡說也亦字亦是發語之辭
亦越猶言越若也

曰 說文云曰從開口象氣出于口也愚案云也論語

牢曰子云其義則一變文以便讀者且又書洪範一
曰壽二曰富三曰康甯四曰攸好德五曰考終命此
曰字猶云謂之又書堯典曰若稽古帝堯蔡傳云曰
粵越通古文作粵曰若者發語辭周書越若來三月
亦此例也愚案曰辭也若亦辭也曰若重言之也如
書洪範八庶徵曰雨曰暘曰燠曰寒曰風曰時五者
來備各以其敘庶草蕃庶左傳昭公十四年曰義也
夫可謂直矣張平子東京賦曰止曰時此曰字在句

首發語辭也

曰雨曰暘之曰即五福一曰壽二曰富
之曰不言一二者省也此曰字非是語

辭曰時五者來備之曰乃是如詩國風彼人是哉子

語辭猶云惟是五者來備也曰何其漢書賈誼傳然并心而赴時猶曰歷六國兼

天下此曰字在句中語助辭也鄭箋訓子曰之曰為

於於亦語辭不為義也

沒 小爾雅云無也王仲初詩暗中頭白没人知

咄 廣韻云呵也愚案怒而叱之也音當沒切北人怒

呵則音如兜又相輕弄亦呼曰咄音如特歸切如漢

書東方朔傳嘲笑之曰咄口無毛聲警警尻益高此

咄字戲弄之聲非怒叱之也又如後漢書袁譚傳譚

墮馬顧曰咄兒過我我能富貴汝此咄字若似怒叱

然譚見追墮馬知追者必得己以為功雖乞憐無益

乃為項籍吾為若德之語如游俠兒瀕死猶強顏自

大故云兒過我我能富貴汝此咄字亦當讀如特歸

切也又衛夫人帖咄咄逼人世說唯作咄咄怪事四

字而已咄咄驚歎聲也

曷 爾雅云益也說文云何也易損卦彖辭曷之用二

盍可用亨詩國風心之憂矣曷維其已書戡黎天曷

不降威荀子俛詩曷維其同楊注云言何可與之同

也愚案維語辭詩云曷維猶言如何與此義別又詩國風曷不肅雝王姬之車曷不猶云豈不與哉黎曷不義別荀子強國篇曷若是而可以持國乎後漢書曹爽傳禮云禮云曷其然哉陳蕃傳言觀殄瘁曷非云亾諸曷字竝豈也曷非猶豈不也曷得爲豈者何甯也甯豈也又後漢書李雲傳論禮有五諫諷爲上若夫託物見情因文載旨使言之者無罪聞之者足以自戒貴在意達言從理歸乎正曷其絞訐摩上以銜沾成名哉此曷字何豈二義竝通曷其猶云豈有

何有與曹爽傳曷其義別又書盤庚曷虐朕民此言柰何虐我民也召誥曷其柰何弗敬曷其柰何重言也此曷其與後漢書兩曷其義別

忽 倏也漢書高帝紀嫗因忽不見周密鳳棲梧詞忽地香來無覓處忽地方言也

害 爾雅云益也詩國風害澣害否毛傳云害何也鄭箋云我之衣服今者何所當見澣乎何所當否乎愚案害曷音近故得轉爲何也

末 廣韻云無也論語末由也已果哉末之難矣末之

難猶云無所難也又公羊傳哀公十四年末不亦樂乎堯舜之知君子也未不亦猶云無亦此末字疑辭也

脫 或辭猶儻也世說王汝南既除所生服遂停墓所兄子濟每來拜墓略不過叔叔不候濟脫時過止寒溫而已

竊 論語竊比於我老彭疏云不敢顯言故云竊也愚案凡云竊者謙辭不敢徑直以爲何如故云竊也
洩 必辭也漢書趙充國傳兵洩可期月而望

迭 廣韻云更也愚案更互也左傳昭公十七年師夜從之三呼皆迭對孟子迭爲賓主又史記封禪書軼興軼衰漢書郊祀志作迭興迭衰軼一音顛結切故得通爲迭也

蔑 廣韻云無也左傳僖公十年臣出晉君君納重耳蔑不濟矣文公十七年雖我小國則蔑以過之矣

竭 呂氏春秋膠鬲見武王於鮪水曰西伯竭來無欺我也武王曰不子欺將伐殷也膠鬲曰竭至武王曰將以甲子日至注云竭何也又顏延年秋胡詩竭來

助字辨略
三
空復辭注云揭與盍同正字通云揭發語辭揭來猶
聿來或以爲去來也愚案去來之說非

絕 殊也了也史記封禪書上與公卿諸生議封禪封
禪用希曠絕莫知其儀禮游俠傳殺者亦竟絕莫知
爲誰又史記梁孝王世家平王大母李太后曰先王
有命無得以罍樽與人他物雖百巨萬猶自恣也任
王后絕欲得之世說謝太傅絕重楮公此絕字極也
甚也

劣 廣韻云少也愚案僅也周語余一人僅亦守府聿

注云僅猶劣也僅得爲劣則劣亦得爲僅矣宋書劉
懷真傳子德願善御車常立兩柱使其中劣通車軸
驅牛奔從柱閒直過胡藩傳江津岸峭壁立藩以刀
頭穿岸劣容指于是徑上鍾磔詩品師鮑昭終不及
日中市朝滿學謝朓劣得黃鳥度青枝杜子美詩劣
于山有陰諸劣字其義竝同少力爲劣劣是弱辭也
弱者不足之義故得爲僅也

煞 方言極也太甚之辭程子經解云煞害義理朱子
荅陸子論無極書云太煞分明

別 另也史記高帝紀使沛公項羽別攻城陽南唐後
 主相見歡詞別是一般滋味在心頭又各也易緯稽
 覽圖云卦氣起中孚故離坎震兌各主一方其餘六
 十卦卦有六爻爻別主一日凡主三百六十日此言
 每爻各主一日六十卦有三百六十爻故主三百六
 十日也

設 史記竇田傳此特帝在卽錄錄設百歲後是屬甯
 復有可信者乎索隱云設者脫也愚案脫儻或也假
 如也

略 率也總舉其疆理曰略故詩爲大率之辭也漢書
 外戚恩澤侯表至乎孝武元二宿將略盡后妃傳詩
 書所歎略同一揆魏志王朗傳注今此諸賢者略余
 之所識也高柔傳至如滎陽左右周數百里歲略不
 收元元之命實可矜傷世說丞相末年略不復省事
 又通作頗略粗略之略孟子此其大略也又孟子始
 作俑者其無後乎朱注云古之葬者束草爲人以爲
 從衛謂之芻靈略似人形而已

卻 還也史記封禪書又言臣侯日再中居頃之日卻

復中皇甫士安三都賦序曩者漢室內潰四海圯裂
孫劉二氏割有交益魏武撥亂擁據留夏故作者先
爲吳蜀二客盛稱其本土險阻瓌瑋可以偏王而卻
爲魏主述其都畿宏敞豐麗奄有諸華之意溫飛卿
詩莫羨相如卻到家又云香輦卻歸長樂殿又云卻
逐嚴光向若耶又轉也李義山詩何當共翦西窗燭
卻話巴山夜雨時趙嘏詩谿頭盡日看紅葉卻笑高
僧衣上塵司空表聖詩逢人漸覺鄉音異卻恨鶯聲
似故山又方澤詩貪看飛花忘卻愁君山父老詩日
暮忘卻巴陵道此卻字方言語助猶云了也

諾 禮記曲禮父召無諾先生召無諾呂氏云諾者許
而未行也愚案諾者應之緩也內則云男唯女俞唯
是應之速然則承君父先生之召當唯而不當諾非
許而未行之謂也如論語子貢曰諾吾將問之此雖
未遽問而業已諾之也夫子曰諾吾將仕矣此雖心
不然而姑且諾之也皆是應之舒緩不以行不行爲
義應之舒緩近于怠慢故承君父先生之召皆無諾
也

著 方言語助也許用晦詩逢著仙人莫下碁李義山
詩記著南塘移樹時又杜子美詩迷方著處家李義
山詩著處斷猿腸著處猶云到處也

若 廣韻云如也孟子無若宋人然孟子趙敘若此者
眾如若竝象似之辭也又孟子吾豈若使是君爲堯
舜之君哉豈若猶何如商較之辭也又荀子強國篇
如是則齊必斷而爲四三國若假城耳必爲天下大
笑曷若楊注云曷若者問以爲何如也漢書韓信傳
僕欲北攻燕東伐齊何若有功師古云何若猶言何

如也愚案此言如之何也與荀子曷若義同乃問可
否之辭也又漢書霍光傳時霍山自若領尙書師古
云自若猶言如故又詩國風猗嗟昌兮頤而長兮抑
若揚兮美目揚兮正義云若猶然也此言頤若長兮
史記孔子世家稱孔子說文王之狀云黯然而黑頤
然而長是知爲長貌也今定本云頤而長兮而與若
義竝通也愚案正義蓋以頤而長爲頤若長抑若揚
爲抑然揚也而若然竝是語辭故通也荀子子道篇
子路趨而出改服而入蓋猶若也猶若卽猶然楊注

云舒緩之貌禮記君子蓋猶猶爾也又論語君子哉若人尚德哉若人包注云若人者此人也公羊傳楚人爲無道君如有憂中國之心則若時可矣若時者此時也又書大誥王曰爾惟舊人爾丕克遠省爾知甯王若勤哉若勤者若此勤也但云若者省也孟子以若所爲求若所欲言以如此所爲求如此所欲也史記禮書人苟生之爲見若者必死苟利之爲見若者必害索隱云人苟以貪生爲見不能見危致命如此者必刑戮及身也漢書賈誼傳頽頓亾恥莫詬亾

節廉恥不立且不自好苟若而可師古云若猶然也此然字亦是如此之辭苟若而可者言苟且若此而可也又儀禮士相見禮君若降送之則不敢顧辭遂出疏云若者不定之辭也愚案設辭也如左傳隱公元年若掘地及泉隧而相見其誰曰不然十一年寡人若朝於薛不敢與諸任齒諸若字竝假設之辭也又襄公二十六年印革父與皇頡戍城麋楚人囚之以獻於秦鄭人取貨於印氏以請之子太叔爲令正以爲請子產曰不獲受楚之功而取貨於鄭不可謂

國秦不其然若曰拜君之勤鄭國微君之惠楚師其猶在敝邑之城下其可若曰者亦假設之辭也又左傳隱公五年若夫山林川澤之實器用之資阜隸之事官司之守非君所及也若夫者相及而殊上事之辭也哀公十四年若以先臣之故而使有後君之惠也若臣則不可以入矣上若字設辭也下若字殊上之辭也孟子乃若其情則可以爲善矣乃所謂善也若夫爲不善非才之罪也乃若發語辭也若夫殊上之辭也又庾子山小園賦若夫一枝之上巢父得安

巢之所一壺之中壺公有容身之地此若夫發端之辭與上義別又左傳襄公十一年孟氏使半爲臣若子若弟顧氏補正云若猶或也邵氏云於三分得一之中使半爲臣臣其子則父歸公臣其弟則兄歸公所謂半也又漢書高帝紀以萬人若一郡降者封萬戶惠帝紀民年十七以上若不滿十歲有罪當刑者皆完之師古竝云若者豫及之辭愚案若猶與也及也暨也連而及之之辭師古云豫及恐是與及之譌耳又孟子宜若可爲也史記封禪書文帝出長安門

若見五人於道北又云天子既已封泰山無風雨災而方士更言蓬萊諸神若將可得又云公孫卿言見神人東萊山若云欲見天子此若字疑辭猶似也又魏志高堂隆傳今無若時之急而使公卿大夫竝與厮徒共供事役聞之四夷非嘉聲也若時猶云向時彼時也又左傳襄公三十二年無若諸侯之屬辱在寡君者何無若猶無柰也又漢書食貨志或用輕錢百加若干師古云若干且設數之言也干猶箇也謂當如此箇數耳愚案若干者未定多少且約計之也

又漢書兩龔傳常悲謂勝曰我視君何若何若猶何等也又郭景純爾雅序若乃可以博物不惑於鳥獸草木之名者莫近於爾雅邢疏云若乃者因上起下語上既言其功用此復美其博物故云若乃又左傳襄公十三年天子求后於諸侯諸侯對曰夫婦所生若而人妾婦之子若而人無女而有姊妹及姑姊妹則曰先守某公之遺女若而人杜注云不敢譽亦不敢毀故曰若而人顧氏補正云若而人猶言某某愚案若而猶言若干杜訓而爲如非是顧義較長也又

邢昺爾雅注疏序泊夫醇醪既異步驟不同一物多名繫方俗之語片言殊訓滯今古之情將使後生若爲鑽仰宋書王景文傳居貴要但問心若爲耳唐書孫伏伽傳陛下自作須自守之使天下百姓信而畏也自爲無信欲人之信若爲得哉柳子厚詩若爲化得身千億散作峯頭望故鄉杜荀鶴詩承恩不在貌教妾若爲容若爲猶云如何也文王摩詰詩明到衡山與洞庭若爲秋月聽猿聲杜子美詩幸不折來傷歲暮若爲看去亂鄉愁此若爲近於那堪然如何那堪竝是不可柰何之辭則其義亦同也

約 畧計之也魏志華佗傳疾者前入坐見佗北壁懸此蛇輩約以十數又大約猶大略也大凡也

莫 廣韻云無也詩國風莫敢或遑中庸見而民莫不敬孟子莫非命也又毋也勿也陶淵明詩得酒莫苟辭又不也弗也禮記祭統是故天子親耕於南郊以共齊盛主后蠶於北郊以其純服諸侯耕於東郊亦以其齊盛夫人蠶於北郊以其冕服天子諸侯非莫耕也主后夫人非莫蠶也此言天子諸侯非以齊盛

之故不親耕也主后夫人非以祭服之故不親蠶也
云非莫者省也又郭景純爾雅敘莫近於爾雅何休
云莫近言莫過之也愚案莫近於爾雅言無有切近
於爾雅也如孟子晉國天下莫強焉漢書高帝紀蓋
聞王者莫高於周文伯者莫高於齊桓史記文帝紀
代王曰宗室將相王列侯以爲莫宜寡人寡人不敢
辭諸此莫字竝是無有之辭也又論語文莫吾猶人
也朱子語類云莫疑辭猶今人云莫是如此否莊子
則陽莫爲盜注云莫疑辭也包何詩莫是上迷樓莫
是者方言猶今云恐是也又宋史岳飛傳莫須有三
字何以服天下莫須猶莫是也又王右軍止殷浩北
伐書今軍破於外資竭於內保淮之志非復所及莫
過還保長江都督將各復舊鎮自長江以外羈縻而
已莫過猶云不如也又郭頡古墓斑狐記遮莫干試
萬慮其能爲害乎杜子美詩遮莫鄰雞下五更遮莫
猶云儘教一任其如何也又盧祖臯詞溪魚堪鱸切
莫論錢切莫猶云慎毋方言也

各 說文云異詞也論語盍各言爾志史記五帝紀至

長老皆各往往稱堯舜之處又史記周勃世家最從
高帝得相國一人丞相二人將軍二千石各三人各
三人者言每一輩有三人也與上義微別又後漢書
劉盆子傳各各屯聚吳志甘甯傳注時諸英豪各各
起兵各各重言也

索 漢書成許后傳俟自見索言之師古云索盡也又
李義山詩單棲應分定辭疾索誰憂此索字猶須也
索誰憂猶云要須誰憂今云要當如何曰須索如何
也

迕 公羊傳襄公二十九年今若是迕而與季子國季
子猶不受也鄭注云迕起也倉卒意愚案此與乍義
近乍是忽然事興故鄭訓迕爲起也

薄 詩國風薄言采之毛傳云薄辭也正義云時邁云
薄言震之箋云薄猶甫也甫始也有客曰薄言追之
箋云王始言餞送之以薄爲始者以時邁下句云莫
不震疊明上句薄言震之爲始動以威也有客前云
以繫其馬欲畱微子下云薄言追之是時將行王始
言餞送之詩之薄言多矣唯此二者以薄爲始餘皆

馬字辨
爲辭也。愚案薄辭也。言亦辭也。薄言重言之也。詩凡云薄言皆是發語之辭。非時邁有客二詩又別爲甫始不如正義所云也。

噉 史記外戚世家褚先生云武帝下車泣曰噉大姊何藏之深也。正義云噉責失聲驚愕貌。

劇 說文云尤甚也。世說今日與謝孝劇談一出來劇猶悞也。一出猶云一番方言也。

嚇 莊子秋水於是鴟得腐鼠鵙雛過之仰而視之曰嚇。注云嚇怒其聲恐其奪己也。詩箋云以口拒人曰

嚇。愚案嚇恐之之聲也。

格 白香山詩如今格是頭成雪元微之詩隔是身如夢洪容齋隨筆云格隔義同猶云已是也。又白香山詩都子新歌有性靈一聲格轉已堪聽。此格字甫也。纔也。

益 廣韻云增也。愚案加甚之辭也。孟子如水益深如火益熱。漢書高帝紀民又益喜。惟恐沛公不爲秦王

驀 忽也。馬莊父孤鸞詞驀地刺桐花上有一聲春喚亦 廣韻云總也。書臯陶謨臯陶曰都亦行有九德亦

言其人有德蔡注云亦行有九德者總言德之見於
行者其凡有九也亦言其人有德者總言其人之有
德也又論語不亦說乎正義云言亦者凡外境適心
則人心悅樂可悅樂之事其類非一此學而時習有
朋自遠方來亦悅樂之事耳故云亦猶易云亦可醜
也亦可喜也孟子不亦善乎趙注云不亦者亦也又
孟子亦將有以利吾國乎正義云亦與乎者況物外
不可必又非可止於一事耳故云亦乎與論語不亦
說乎不亦樂乎同愚案亦辭也不爲義者如亦將

有以利吾國乎之亦義近于抑發語辭也論語正義
云可悅樂之事其類非一孟子正義云又非可止於
一事蓋訓亦爲又然則孟子亦有仁義而已矣王亦
曰仁義而已矣兩亦字可訓爲又乎大凡書傳亦字
多是語辭如詩國風亦孔之嘉周頌維莫之春亦又
何求左傳襄公二十四年德國家之基也有基無壞
無亦是務乎司馬相如諫獵書其爲禍也不亦難矣
毛詩周南召南譜其餘江黃六蓼之屬旣驅陷於彼
俗又亦小國猶邾滕紀莒之等杜元凱左傳序文引

經以至仲尼卒亦又近誣毛詩正義序上皇道質故
諷諭之情寡中古政繁亦謳歌之理切諸亦字竝語
辭也他如孟子聖人之於民亦類也又云治亦進亂
亦進又云不受於褐寬博亦不受於萬乘之君此亦
字然後是不殊上事之文正字通訓亦爲又誤也亦
是也辭又是更辭不相涉也

適

正也論語道千乘之國包注云古者井田方里爲
井十井爲乘百里之國適千乘也漢書東方朔傳此
適足以明其不知權變而終惑於大道也又漢書灌

夫傳適得萬金良藥此適字猶俗云恰好與上義微
別又漢書賈誼傳慮不動於耳目以爲是適然耳目
古云適當也謂事理當然也又孟子則口腹豈適爲
尺寸之庸哉此適字猶祗也僅也但也戰國策疑臣
者不適三人注云適音也愚案音亦僅也又後漢書
逸民傳故蒙恥之賓屢黜不去其國蹈海之節千乘
莫移其情適使矯易去就則不能相爲矣此適字假
設之辭猶云若也又漢書賈誼傳陛下之臣雖有悍
如馮敬者適啟其口匕首已陷其胸矣師古云始欲

發言節制諸侯王則爲刺客所殺愚案此適字始也
甫也方也纔也王右軍帖適得書唐書武元衡傳適
從何處來此適字纔也頃也

適 都歷切專主之辭猶云職也左傳僖公五年一國
三公吾誰適從昭公三十年楚執政眾而乖莫適任
患

迪 漢書敘傳漢迪于秦劉德云迪至也

的 定也史記伯夷傳儻所謂天道是耶非耶正義云
不敢的言是非故云儻也白香山詩的無官職趁人

來

職 詩國風無已太康職思其居小雅東人之子職勞

不來書秦誓亦職有利哉柳子厚天爵論然則聖賢
之異愚也職此而已職專也專主也專務之也職守
非異人之任故爲專辭也專務職業無有二志故又
可轉爲唯獨之辭職此猶云唯此也

直 但也詩國風匪直也人孟子直不百步耳又云非

直爲觀美也晉書苻堅載記猛曰方當使君爲宰夫
安直耕稼而已安直猶云何但又徑直也離騷何昔

日之芳草兮又直爲此蕭艾也世說劉尹非不能逮直不逮王仲初詩直到牀前見上皇文史記畱侯世家有一老父衣褐至良所直墮其履圯下索隱云直言正也漢書師古注云直猶故也一曰正也愚案訓正義長又戰國策直使送之注云直猶當也式詩國風式微式微爾雅云式微式微微乎微者也鄭箋云式發聲也又書盤庚式敷民德孔傳云用布示民必以德義愚案此式字猶爰也孔訓爲用者用卽用是爰辭也

極 至極也禮記禮運夫子之極言禮也可得而聞與史記高帝紀豐吾所生長極不忘爾燕世家孤極知燕小力不足以報

抑 詩小雅抑此皇父鄭箋云抑之言噫也疏云抑辭也朱傳云抑發語辭論語抑亦先覺者是賢乎正義云抑語辭也愚案抑者案之使下也凡語辭用抑或是發聲或是轉語其音多下而不揚故云抑也如論語子夏之門人小子當灑掃應對進退則可矣抑末也此抑字猶云然而漢書敘傳囂問彪曰往者周亾

戰國竝爭天下分裂數世然後乃定其抑者縱橫之事復起於今乎此抑字辭之不定猶云或者也又皮襲美和張處士詩序憶承吉之困身後乎魯望視子困與承吉生前熟若哉未有己困而能振人者然抑爲之辭用塞良友之意此抑字猶且也以上三條竝轉語也

亟 廣韻云急也疾也趣也詩豳風亟其乘屋左傳隱公十一年我死乃亟去之管子鮑叔曰若亟召則可得也不亟不可得也

卽 廣韻云就也漢書高帝紀呂公女卽呂后也趙后傳宮卽曉子女此卽字猶俗云就是言非有兩人也又孟子卽不忍其觶觶此卽字猶云但也特也言非愛一牛特是不忍其觶觶耳又左傳襄公八年君有楚命亦不使介行李告於寡君而卽安於楚杜元凱左傳序然亦有史所不書卽以爲義者此卽字猶便也遂也又漢書韓安國傳千里而戰卽兵不獲利此卽字猶則也又史記秦本紀梁我母家也而秦滅之我兄弟多卽君百歲後秦必畱我封禪書上卽欲

與神遇宮室被服非象神神物不至酷吏傳所治卽
上意所欲罪予監史深禍者卽上意所欲釋予監史
輕平者所治卽豪必舞文巧詆卽下口羸弱時口言
雖文致法上財察於是往往釋湯所言此卽字猶若
也又漢書高帝紀項伯許諾卽夜復去文帝紀卽日
夕入未央宮吳志朱然傳郤渡兵攻盛盛不能拒卽
時卻退卽日卽夜猶云當日當夜卽時猶云當時立
時竝急辭也又假設之辭猶云縱令也卽得爲縱者
若之轉也

得 能也世說荀子不得荅而去又史記注錄異傳云
雍南山有大梓樹鬼語樹神曰秦若使人被髮以朱
絲繞樹伐汝汝得不困邪得不猶云豈能不省文也
又杜子美詩他時如案縣不得慢陶潛不得猶云不
可

則 語辭也承上趣下辭之急者也論語行有餘力則
以學文孟子則是方四十里爲阱於國中漢書公孫
宏傳儒雅則公孫宏董仲舒兒寬篤行則石建石慶
張平子南都賦其山則崆峒嶠嶠其木則檉松楔櫻

其竹則鐘籠篳篥又乃也詩大雅則友其兄則篤其
慶孟子天下之言性也則故而已矣又云是則章子
已矣史記項羽紀沛公則置車騎又云項王則受璧
蔡中郎答詔問災異八事建大中之道舉賢良而寵
祿之則其救也吳志太史慈傳卿則州人昔又從事
諸此則字竝辭之緩者也又易繫辭亂之生也則言
語以爲階史記高帝紀今聞章邯降項羽項羽乃號
爲雍王王關中今則來沛公恐不得有此大宛傳則
離宮別觀芻盡種蒲陶苜蓿極望漢書王莽傳應聲

滌地則時成創才調集無名氏詩若非葉下滴秋露
則是井底圓春冰諸則字猶卽也則卽皆語之急故
通也又荀子強國篇兼數具者而盡有之然而縣之
以王者之功名則倜倜然其不及遠矣是何也則其
殆無儒耶則其猶云斯其則得爲斯者乃之轉辭之
緩者也又詩國風匪離則鳴蒼蠅之聲禮記學記學
者有四失教者必知之人之學也或失則多或失則
寡或失則易或失則止此四者心之莫同也此則字
語助猶云之也又史記天官書數至十二日直其月

占水旱爲其環城千里日占則其爲天下占竟正月
孟康云月三十日周天歷二十八宿然後可占天下
也愚案此言正月一日雨則正月水二月雨則二月
水此爲千里內占日若爲天下占則以盡一正月爲
驗也此則字假設之辭猶云若也漢書五行志則其
爲天下占作卽爲天下驗則卽竝若辭也刺客傳誠
得劫秦王使悉反諸侯侵地若曹沫之與齊桓則大
善矣則不可因而刺殺之則大善矣之則乃也則不
可之則若也又漢書五行志時則有服妖時則有龜
孽時則有雞禍時則有下體生上之病時則有青眚
青祥又云每一事云時則以絕之言非必俱至或有
或亾或在前或在後也愚案此如書君奭時則有若
伊尹時則有若保衡之例也

克 廣韻云能也夏書先王克謹天戒臣人克有常憲
又史記律書且兵凶器雖克所願動亦耗病此克字
猶云如也又通作剋王延壽靈光殿賦非夫通神之
俊才誰能剋成乎此勳能剋重言也

特 廣韻云獨也史記高帝紀吾特爲其以雍齒故水

經注晉太康地記云汝南西平縣有龍淵水可用淬
刀劍特堅利又荀子勸學篇上不能好其人下不能
隆禮安特將學雜識志順詩書而已目楊注云特猶
言直也愚案直但也漢書高帝紀毋特俱死文穎云
特獨也蘇林云特但也師古云蘇說是也但空也空
死而無所成名又方雄飛詩落絮縈風特地飛特地
方言猶云故故也

或

廣韻云不定也易繫辭或出或處或默或語又詩
關風今此下民或敢侮予此或字猶云誰也不定其

誰何故云或也如易恆卦九三不恆其德或承之羞
孟子或曰放焉此皆無所指名故云或也漢書禮樂
志或曰不能具禮師古云或曰者劉向設為難者之
言而後答釋也又左傳僖公十九年天其或者欲使
衛討邢乎孟子昔者辭以病今日弔或者不可乎或
者疑辭猶云無乃也又左傳襄公二十一年賞而去
之其或難焉此或字與或者同又虞書罔或干予正
孔傳云或有也無有于我正言順命也後漢書應劭
傳開辟以來莫或茲酷注云或有也愚案凡訓或為

有者省文也罔或于予正言罔或有于予正也莫或
茲酷言莫或有茲酷也如書五子之歌有一于此未
或不亾言未或有不亾也左傳襄公二十三年毋或
如東門遂不聽公命殺適立庶言毋或有如東門遂
不聽公命殺適立庶也凡云有者非常有也故或得
省爲或有也有一於此斯謂之或無或者無一不然
之謂也又詩小雅如松柏之茂無不爾或承此言無
或不爾承也蓋倒言之義與上同

及 廣韻云至也逮也詩周頌燕及皇天左傳襄公二

十三年紂之罪不及不祀戰國策及今聞君子之言
漢書賈誼傳火未及然因謂之安不及不祀言不至
于不祀也火未及然言猶未至于然也又史記高帝
紀及其鋒而用之可以有大功此及字猶云乘也今
謂乘時曰及時乘蚤曰及蚤也又李義山詩景陽宮
裏及時鐘此及時猶云應時也又左傳僖公十五年
先君之敗德及可數乎杜注以先君之敗德及爲句
絕非也及字當屬下句及可數乎者猶云可及數乎
言敗德多雖稱數不及倒言之也又孟子及至葬及

其間一善言及至及其皆因前事而殊後事之文又
春秋隱公元年公及邾儀父盟于蔑公羊傳云及者
何與也愚案與猶共也暨也又左傳文公三年秦伯
伐晉濟河焚舟取王官及郊史記五帝紀東至於海
登丸山及岱宗此及字連及之辭也與上義別
立 卽也猶云卽時也史記留侯世家於是呂澤立夜
見呂后漢書董仲舒傳此皆可使還至而立有效者
也又桓譚新論劉子駿聞吾言乃立稱善焉此立字
猶云卽便與上義微別

合 應也當也史記司馬相如傳然則受命之符合在
於此矣杜子美詩橈性合幽棲又云蓬萊足雲氣應
合總從龍應合重言也

盍 爾雅云何不也論語盍各言爾志盍徹乎張平子
東京賦盍亦覽東京之事以自寤乎盍云何不者辭
之急者也緩言之則爲何不耳又王爽聖主得賢臣
頌盍令不行此盍字猶何也與上義別又通作闔管
子桓公謂鮑叔牙曰闔不起爲寡人壽乎莊子夫子
闔行邪無落吾事管云闔何也莊云闔何不也

輒 廣韻云專輒也世說華歆王朗俱乘船避難有一人欲依附歆輒難之此輒字專辭猶云獨也特也唐高宗述聖教序輒以輕塵足嶽墜露添流此輒字專擅之辭猶云敢也又漢書董仲舒傳凡相兩國輒事驕王此輒字猶云每也言所事者動輒是驕王也又漢書吾邱壽王傳十賊曠弩百吏不敢前盜賊不輒伏辜免脫者眾此輒字猶即也又漢書會貨志地方百里之增減輒為粟百八十萬石矣此輒字猶則也李陵報蘇武書故每攘臂忍辱輒復苟活輒復猶云

則又

恰 適也杜子美詩野航恰受兩三人

業 既已也史記外戚世家太后業已許其行酒無以罪也畱侯世家良業為取履因長跪履之劉敬傳是時漢兵已踰句注二十餘萬兵已業行業已已業並重言也

阿 顧氏日知錄云隸釋漢殺阮碑陰云其間四十人皆字其名而繫以阿字如劉興阿興潘京阿京之類必編戶民未嘗表其德書石者欲其整齊而強加之

猶今閭巷之婦以阿挈其姓也成湯靈臺碑陰有主
吏仲東阿東又云惟仲阿東年在元冠幼有中質又
可見其年少而未有字抱朴子禰衡游許下自公卿
國士以下衡初不稱其官皆名之云阿某三國志呂
蒙傳注魯肅拊蒙背曰非復吳下阿蒙世說注阮籍
謂王渾曰與卿語不如與阿戎語皆是其小時之稱
也亦有以阿挈其字者世說桓公謂殷淵源爲阿源
謝太傅謂王修齡爲阿齡王子敬爲阿敬婦人以阿
挈姓則隋獨孤后謂雲昭訓爲阿雲唐蕭淑妃謂武

后爲阿武韋后降爲庶人稱阿韋劉從諫妻裴氏稱
阿裴吳湘娶顏悅女其母焦氏稱阿顏阿焦是也亦
可以自稱其親焦仲卿妻詩堂上啟阿母阿母謂阿
女是也亦可爲不定何人之辭古詩道逢鄉里人家
中有阿誰三國志龐統傳先主謂曰向者之論阿誰
爲失晉書沈充傳敦作色曰小人阿誰是也阿者助
語之辭愚案阿本收歌韻不載入聲然方言多讀作
俄合切故附卷末南人稱阿猶北人稱老如白香山
詩常被老元偷格律是也又阿堵猶云此箇也世說

舉卻阿堵物又云傳神寫照正在阿堵中

助字辨略卷之五終

海昌唐兆榴茂午校

錢訓導泰吉跋舊刻本

得此書二十餘年矣馮柳東嘗欲見奪未之付也今年
硤川蔣生沐見余曝書雜記中述此書假鈔其副爲重
裝見還因記己亥春仲

鄉先哲王先生元毅與胡書巢論脩濟甯州圖記書云
前見堂邑志中所論代編一款知爲有學有識之士近
代百年閒少有能如此存心如此考究者因欲得此一
書閱之猥蒙卽以見贈云云見祇平居士集卷十七當
卽謂劉南泉淇所撰之志濟甯圖記祇平居士所脩者

且字彙
不知刻否當訪求圖記及堂邑志則劉君之生平大略
可見

祇平居士濟甯州圖記稿本爲金岱峯所藏假余兩年
矣戊申正月朱述之明府緒曾羅鏡泉廣文以智借鈔
此書乃從圖記檢尋劉君事文僅附見於其弟汶傳中
云淇字衛園工爲詩古文與汶同受知於


世宗當時有二難之目藝文志中亦僅錄衛園集及堂
邑志衛園集不著卷數堂邑志二十卷錄其述例一條
然則此書祇平居士亦未見其晦塞蓋已久矣


錢訓導泰吉曝書雜記

二十年前見茗估持書目有助字辨略謂是鄉學究啟
悟童蒙俾免杜溫夫之誚爾及得其書而讀之則先秦
兩漢舊籍引據該洽實爲小學書之創例撰人爲確山
劉淇武仲凡五卷自序謂其類三十曰重言曰省文曰
助語曰斷辭曰疑辭曰詠歎辭曰急辭曰緩辭曰發語
辭曰語已辭曰設辭曰別異之辭曰繼事之辭曰或然
之辭曰原起之辭曰終竟之辭曰頓挫之辭曰承上曰
轉下曰語聲曰通用曰專辭曰僅辭曰歎辭曰幾辭曰

極辭曰總括之辭曰方言曰倒文曰實字虛用釋訓之
例凡六曰正訓曰反訓曰通訓曰借訓曰互訓曰轉訓
班諸四聲因以爲卷其書刊於康熙五十年海城盧承
炎撰序謂所著尙有周易通說禹貢說若干卷謹檢
四庫總目俱未著錄則劉君所著鮮傳本矣後讀陸朗
夫先生切問齋文鈔第十五卷錄堂邑志賦役論乃知
劉君一字龍田號南泉濟甯人有衛園集

皇朝經世文編爵里考同近時王伯申尙書著經傳釋
詞十卷其撰著之意略同此書詰訓益精密然創始之
功不能不推劉君也





王氏元啟濟甯圖記人物列傳

劉汶字魯田其先確山人父毓秀避亂遼左更姓何順
治十一年副榜貢生歷官山東按察使奉

命招撫川陝有功卒葬濟甯遂家焉汶性敏悟讀書一
過不忘經史外九流百氏靡不綜覽康熙二十六年以
復州衛籍中山東鄉試年十八會有言汶父遼東人宜
隸漢軍遂改入旗籍年二十五絕意仕進慨然有求道
之志遂盡棄所學返而求之六經著原命原性及誠者
聖人之本無極而太極諸論皆自成一子年三十二受

聖祖賜復姓得還居濟甯守墳墓

世宗潛藩時特見優禮每多咨詢嘗輯前賢名論切於修齊治平世世可行者分爲敬天誠身務學樹人取人用人養民教民循分凡九篇以爲三才之道備具古書厭陳喜新則所言必非道矣因目之曰陳言自爲之序汶兼精術數自知卒日集親戚子弟曉以生死之理曰人之生如水之凝而爲冰其死如冰之復釋爲水還我太虛又何憾焉端坐而逝門人孫文載文丹等私謚爲

文正先生輯其書得七卷具藝文志汶兄淇字衛園工爲詩古文與汶同受知於

世宗當時有二難之目汶子柏字蒼巖中順天鄉舉雍正三年試中書第一授岢嵐知州陞辭之日

世宗出陳言一冊授之曰此汝父所述期汝勉承遺志以副朕望後官安徽按察使任滿

命總理北路營餉軍務以勤事卒官柏粹資勤學老不釋卷尤工吟咏居憂有哀慕詩出塞爲塞外吟忠孝之性溢于辭表遇事立斷雖跋歷遠邇致位三品人以爲

且字辨田
未竟厥施云

濟甯圖記藝文志

乙部傳記類

舉人劉汶詔對一卷

乙部地理類

監生劉淇堂邑志二十卷其述例云國史方志雖小大殊科體原一貫苟非上探六籍下籠百氏本之古而不泥通于今而不流不免舉其一而廢百顧之左而失右余爲此志雖不敢與古作者爭長然而按部就班各止其所錯綜取舍頗單厥心其或者鐵中錚錚庸中佼佼則未敢多讓焉耳

丙部儒家類

劉汶太極答問一卷陳言一卷女訓一卷

丁部別集類

劉淇衛園集 劉汶魯田詩二卷雜文一卷

圖記衛園坵其弟魯田詩并坵衛園之子因錄全文以見劉氏之家學間衛園撰著其鄉人已不能備知魯田之書恐亦不能通行故於藝文志所著錄亦兼

錄焉以待搜訪云錢泰吉識

以見隱刃之末學商而國者其為人必不始論以

國而論其學商而論其為人必不始論以

隱其商而論其為人必不始論以

丁酉夏

隱其商而論其為人必不始論以

丙子

隱其商而論其為人必不始論以

隱其商而論其為人必不始論以

